

# SOLENITÂT DI NESTRI SIGNÔR JESU' CRIST RE DAL MONT INTÎR

## Jutoris pe Liturgjie

Domenie, ai 25 di Novembar dal 2018

*O resti dal parê che il rît di Aquilee cul poni la solenitât de Ss.Trinitât te ultime domenie dal an liturgjic le veve indovinate. La conclusion dal an, de vite, de storie e dal mont intîr e sarà cuant che Crist al consegnarà il ream a Diu Pari, dopo di vê ridusût a nuie ogni principât, potestât e potence (1 Cor 15, 23-24): dut si concludarà tal misteri eterni dal Diu Pari, Fi e Spirtu Sant.*

*La solenitât di vuê, seont il rît roman, nus mene invezit al Crist trionfadôr e e pues vê un pericol insidiôs: viodi za ca vie di ca chê glorie cence fin che o podarìn contemplâ in Crist dome là vie di là.*

*Nus salve di chest pericol il vanzeli che midiant un tocuto dal procès di Pilât a Jesù nus presente il troi di fâ: o sin cumò dissepui di un Crist coronât re cuntune corone di spinis (Zn 19, 2) in spiete di viodilu in avignî coronat di glorie.*

*Pal moment, Crist al è un re che al patîs fan, set... preson... e al à la muse dal tribulât che nissun abade, al po' dâsi, ancje tai nestris paîs; dome tal judici finâl lui si palesarà su la sô sente di glorie e al condanarà chei che no lu àn ricognossût "re puar" fra i tribulâts di chest mont. (Cfr. Mt 25, 1-46).*

### Antifone di jentrade

Ap 5,12; 1,6

**L'**Agnel ch'al è stât copât al merte di vê potence e ricjece, sapience e fuarce e onôr: a lui la glorie e la potence tai secui dai secui.  
**Si dîs** Glorie a Diu.

### Colete

Diu onipotent e eterni,  
che tu âs volût tornâ a fâ dutis lis robis  
in Crist, to Fi, Re dal mont intîr,  
danus la gracie  
che dute la creazion, sfrancjade de sclavitût,  
e servissi la tô maiestât e ti laudi cence mai finî.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE

Dn 7,13-14

**La sô potence e je une potence eterne.**

*La vision che nus ven presentade e varès dibisugne dal so inizi e conclusion, dal toc intîr che o cjatìn in Denêl 7, 1- 14 li che i imperis di chest mont a son come cuatri besteonis, un leon, un ors, une pantere e une altre bestie tremende di fâ inglaçâ il sanc. Però al è ancje un Diu eterni, Vieli di dîs e un Fi dal om un vivent mistereôs che a lui i fo dade potence, fuarce e paronance. Chel Fi dal om al è Jesù fi di Josef di Nazaret e Fi di Diu (Zn 2, 45. 49).*

*Il so ream, che al à par fonde l'amôr eterni, universâl e fedêl di Diu, nol vignarà par mai distrust.*

### Dal libri dal profete Denêl

O cjalavi tes visions di vie pe gnot:

ve che sui nûi dal cîl  
al vignive indenant come un Fi dal om;  
al rivà fintremai al vieli di dîs  
e lu faserin lâ fin devant di lui.  
A lui i fo dade potence, fuarce e paronance  
e ducj i popui, lis gjernaziis e lis lenghis lu servivin.  
La sô potence e je une potence eterne  
e la sô paronance e je une paronance eterne,  
che no sarà mai fruçade.  
Peraule di Diu. Salm

## SALM RESPONSORIÂL

dal Salm 92

*Scoltade la prime leture, dal cûr al sclope un berli: Il Signor al regne! Ancje nô tal nestri biel Friûl poiât fra monts e mâr o podìn vê dai moments li che o disìn: Ce spettacul! Propit il Signôr al regne! Ma al regne ancje in chês anconis di prât e di campagne li che dongje dal Re in crôs e polsave e e cjapave flât la nestre int in cros ancje jê, come lui.*

*Cumò i nestris vons lu contemplin te sô glorie.*

*Te invocazion, un desideri da l'anime che ducj o sintìn:*

### **R. Ch'al vegni, Signôr, il to ream di lûs.**

*Se cjantât: il cjant dai salms responsoriâi, p. 171.*

Il Signôr al regne! Di maiestât si vuluce,  
il Signôr si è vistût, si è fassât di fuarce. **R.**

Al à saldade la tiere, no cloparà par mai.  
E je salde di simpri la sô sente:  
di simpri in ca tu tu restis. **R.**

Fedêi a mai finî a son i tiei ordins,  
al è sant, Signôr, il to santuari  
fintremai che il timp al dure. **R.**

## SECONDE LETURE

Ap 1,5-8

**Il princip dai rês de tiere al à fat di nô un ream di predis pal so Diu.**

*Une cjante di ricognossince al Signôr testimoni fedêl... e la lezion e continue palesantnus cun altris peraulis e imagjinis lis gloriis di Jesù. Ce grant e colm di amôr che al è il Signôr; ce regai granj che nus à fat e nus fasarà.*

*E reste une domande: pai nestris paîs cence predi ce ajal di volê dî: al à fat di nô un ream di predis pal so Diu e Pari ? La rispueste e je tant e tant impuartante.*

### **Dal libri de Apocalis di san Zuan apuestul**

Gjesù Crist al è il testimoni fedêl, il prin dai muarts e il princip dai rês de tiere.

A di chel che nus vûl ben e nus à sfrancjâts dai nestris pecjâts cul so sanc, ch'al à fat di nô un ream di predis pal so Diu e Pari, a lui la glorie e la potence tai secui dai secui. Amen.

Velu, al ven sui nûi e ognidun lu viodarà; ancje chei che lu an passât fûr par fûr e ducj i popui de tiere si bataran il pet parvie di lui.

Propit. Amen!

Jo o soi l'Alfa e l'Omega, al dîs il Signôr Diu, Chel ch'al è, ch'al jere e ch'al ven, l'Onipotent.

Peraule di Diu.

## CJANT AL VANZELI

cf. Mc 11,10

### R. Aleluia, aleluia.

Benedet chel ch'al ven tal non dal Signôr!

Benedet il so Ream ch'al sta rivant.

### R. Aleluia.

## VANZELI

Zn 18,33-37

Tu disis ancje tu che jo o soi re.

*O assistîn al resocont popolâr di un procès li che la fuarce spirituâl di Jesù, il fari (Mc 6, 3), e fâs front a un alt funzionari dal imperadôr di Rome.*

*L'imterogatori al è su Jesù denunçât di fâsi re dai Judeus; dome che i doi mûts di viodi a son lontanons: Jesù al cjacare di un ream di amôr e Pilât di un ream di domini e di prepotence. La conclusion e pues sucedi ancje tai procès di vuê: Pilât, il judiç, al condane cence vê capît nuie.*

*Dapruîf di lui in chel fari al è il Fi di Diu che al butarà jù ducj i imperis dal mont començant di chel di Rome.*

*L'amôr incjarnât e predicjât di Gjesù al varà la ultime peraule sul domini dal mont. In che di il ream di Diu che cumò al è in zermoi fra di nô al cuvierzarà dute la tiere.*

*Lu prometin la peraule di Jesù e la utopie-fede dal cristian.*

### Dal vanzeli seont Zuan

In chê volte, Pilât i disè a Jesù: «Sêstu tu il re dai Judeus?». I rispuindè Jesù: «Disistu chest di cjâf to o tal ano contât altris sul gno cont?». I rispuindè Pilât: «Soio par câs un Judeu? La tô int e i sorestants dai predis ti an metût tes mêns mans. Ce âstu cumbinât?». I rispuindè Jesù: «Il gno ream nol è di chest mont. Se il gno ream al fos di chest mont, lis mêns vuardiis si saressin batudis par no ch'o fos consegnât tes mans dai Judeus. Ma il gno ream nol è di chenti». I disè alore Pilât: «Sêstu duncje re?». I rispuindè Jesù: «Tu disis ancje tu che jo o soi re. Par chel jo o soi nassût e par chel jo o soi vignût tal mont. Par fâ di testimoni a la veretât. Ducj chei ch'a son de bande de veretât, a scoltin la mê vôs».

Peraule dal Signôr.

Si dis O crôt.

### Su lis ufiertis

Ti ufrin, Signôr, la vitime ch'e à riconciliât la gjernazie umane

e o prein cun umiltât che to Fi

ur dedi a ducj i popui i regâi de unitât e de pâs.

Lui ch'al vîf e al regne tai secui dai secui.

### Antifone a la comunion

Sal 28,10-11

Si è sentât il Signôr re par simpri:

al benedissarà il so popul cu la pâs.

### Daspò de comunion

Daspò di vê spartît il pan de immortalitât,

ti prein, Signôr,

di tignîsi in bon di ubidî ai comandaments di Crist, Re dal mont intîr,

par podê vivi par simpri cun lui tal ream dal cîl.

Lui ch'al vîf e al regne tai secui dai secui.

\* \* \*

**Riflession** di pre Antoni Beline: **De bande de veretât**

La fieste di Crist re dal mont le àn metude sù in chest secul, salacôr par dâur une man a duj i cjadreons dal globo che a stavin criçant o lant in sfas sot dai colps des vueris e des rivoluzions. Tal secul de democrassie, la glesie e à metût in pîts la fieste de monarchie di Crist.

Si podarès dî che la glesie no à pêl di orloi, che no si compagne cun chel dal mont...

*Vanseli par un popul, an B, p. 185*

\* \* \*

## **Cjants**

*Libri Hosanna, sot dal titul Eucaristie: messe, benedizion eucaristiche, rîts e cjants; dal n.7 al n.62 comprendût.*

\* \* \*

### ***Il ream di Diu: testimoneance***

***Oscar Romero (vescul a S. Salvador, copât tal 1980 in timp di messe)  
è testimone eroico del Regno di Dio, Regno di giustizia, fraternità e pace:  
egli concepì e testimoniò il Regno di Dio,  
smettendo di contemplare astrattamente il cielo  
per cercare di instaurarlo concretamente sulla terra;  
smettendo di essere un mero spettatore della realtà sociale  
per diventarne protagonista a partire da e con gli impoveriti.***

Rafael Moreno

\* \* \*

## **Martars 27: San Valerian**

*Valerian al fo vescul di Aquilee dal an 370 av. al 387/388, cuant che il non di chê Glesie al jere cognossût a larc. Dongje de sô sente episcopâl si istruivin in maniere splendide un biel numar di scuelârs, sedi intal cjamp dai studis teologjics che inte pratiche des virtûts.*

**Diu, che tu âs colmât** il sant vescul Valerian di spirt di veretât e di bonvolê  
par ch'al podès passi il to popul,  
danus par plasê di veglâ cence padin te fede e tai tiei comandaments  
par podê sperimentâ la gjonde dal spirt, la devozion e la santitât dal cûr.

Par Crist nestri Signôr. Amen.

\* \* \*

***O saludin chest an liturgjic ringraciant il Signôr pes graciis che nus à regaladis.  
La nestre ricognossince ancje al vanzelist Marc  
e a chês personis che in qualsiasi maniere nus àn judâts tal spirt.  
Se Diu vûl, tal gnûf an liturgjic 2018-2019 o starin in compagnie dal vanzelist Luche;  
lui nus consolarà contant de umanitât semplice, profonde, super-umane, divine di Jesù.  
O sierin chest an liturgjic cu lis peraulis de conclusion de preiere eucaristiche de messe:***

**Par Crist, cun Crist e in Crist,**

**a ti Diu Pari onipotent,**

**te unitât dal Spirtu Sant,**

**dut l'onôr e la glorie**

**par ducj i secui dai secui.**

**Amen.**

***E chest insiemi al nestri popul e comunitâts cristianis  
sparniçadis cui ultims in ogni cjanton dal Friûl.***

***Te Sante Trinitât, tal spirt e te umanitât di Crist,  
lôr a son zermoi, flôr e pome,  
promesse di une gnove biele stagjon cristiane  
tes nestre societât, borgadis, citadinis e paîs.***

\* \* \*

- \* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- \* *Il cjant dai salms resposoriâi, Ed. Glesie Furlane, 2012.*
- \* *50 corâi de cristianitât todescje voltâts par furlan, ed. Glesie Furlane, 2016.*
- \* *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La Nuova Base.*
- \* *Par domandâ chescj libris scrivêt a [info@glesiefurlane.org](mailto:info@glesiefurlane.org)*